

समे – 12:25

<><><><><><>

Counting

महाराष्ट्र ते झारखंड च होए दे विधानसभा चुनाएं दे अज्ज वोटें दी गिनतरी होआ करदी ऐ। महाराष्ट्र च बीजेपी दी बगुवाई आले महायुति गठबंधन नै बढ़त बनाई दी ऐ। उत्थें कुल 288 सीटां न जिंदे चा खीरी जानकारी थोने तगर बीजेपी, एसएचएस (शिवसेना शिंदे गुट), एनसीपी, एसएचएसयूबीटी(शिव सेना उद्धव गुट) ते आईएनसी कांग्रेससीटें पर अग्रे चला करदियां न। तोआई झारखंड च बी वोटें दी गिनतरी दा कम्म बरोबर जारी ऐ। ताजा आंकड़े मूजब जेएमएम(झारखंड मुक्ति मोर्चा), आईएनसी (कांग्रेस), बीजेडी(राष्ट्रीय जनता दल), एजेएसयूपी (ऑल झारखंड स्टूडेंट यूनियन पार्टी)सीटें पर बढ़त बनाई दी ऐ।

<><><><><><>

PM India

प्रधानमंत्री नरेन्द्र मोदी होरें आखेआ ऐ जे अज्ज भारत दुनिया दी सारे शा तेजी कन्नै बधदी बड्डी अर्थबवस्था ऐ ते दुनिया दा हर मुख्य विकास लेई भारत कन्नै साझेदारी करना चाहदा ऐ। जर्मनी दे स्टगार्ट च मीडिया हाउस आस्सेआ आयोजित इक कार्यक्रम च वीडियो कांफ्रेंसिंग राएं संबोधत करदे होई उनें आखेआ जे अज्ज हर कोई भारत दी सामरिक महत्ता गी समझा करदा ऐ। “भारत-जर्मनी सतत विकास लेई इक खाका” विषय पर आयोजित इस कार्यक्रम च मोदी होरें आखेआ जे पिछले 10एं बरें च उंदी सरकार आस्सेआ लागू कीते जा'रदे रिफार्म, परफार्म ते ट्रांसफार्म आले मूलमंत्र दे कारण भारत उप्पर दुनिया दा भरोसा बी बधेआ ऐ। उनें आखेआ जे भारत नै हर क्षेत्र च नमियां नीतियां आंदियां न ते अपने आपै गी 21मीं सदी च तेजिया कन्नै विकास दी रफ्तार फगड़ने लेई तैआर कीता ऐ। मोदी होरें आखेआ ऐ जे 2047 तगर भारत गी इक विकसित मुख्य बनाने लेई इक मजबूत मुंड पाई दित्ता गेदा ऐ, जेह्दे उप्पर विकसित भारत दी विशाल इमारत दा निर्माण कीता जाग। उनें आखेआ जे भारत दी विकास यात्रा च जर्मनी इक भरोसेमंद भ्याल ऐ।

<><><><><><>

PM-Quiz

प्रधानमंत्री नरेन्द्र मोदी होरें भारतवासिएं ते होरने देसै दे लोकें गी “भारत को जानिए” नां दे क्विज़ च हिस्सा लैने लेई आखेआ ऐ। इक सोशल मीडिया पोस्ट च प्रधानमंत्री होरें आखेआ जे एह प्रश्नोत्तरी प्रतियोगिता भारत ते समूलची दुनिया च रौहने आले भारतीय मूल दे लोकें बशकार सरबबंधें गी होर निगगर बनांदी ऐ। मोदी होरें इसी देश दी सगोसार विरासत ते जीवंत संस्कृति गी जानने दा इक शानदार जरिया गलांदे होई आखेआ ते इस क्विज़ दे जेतुएं गी “अतुल्य भारत” दे दर्शन करने दा मौका थोग।

<><><><><><>

CM Rabta

मुख्यमंत्री उमर अब्दुल्ला होरें कल श्रीनगर च अपने “राबता” दफ्तर दा उद्घाटन कीता जेहदा मकसद पारदर्शी, जनता केन्द्रित ते जवाबदेह प्रशासन गी जकीनी बनाने दी इक पक्की बवस्था ऐ। इक्कै थाहर सब्बै सुविधा उपलब्ध कराने दे मकसद कन्नै शुरू कीते गेदे इस दफ्तर दा मकसद डेटा आधारित निगरानी ते रणनीतिक संचार दी मदद कन्नै लोकें दिएं दिक्कतें शकैतें ते मंगें गी सुनना ते उंदा बनकदा नबेड़ा करना जकीनी बनाना ऐ।

<><><><><><>

Baramulla

जम्मू कश्मीर पुलसै प्रदेश दे बारामुला ते जम्मू जिलें च नशीले पद्धार्थे दे इक कारोबारी दिएं केई संपत्तिएं गी कुर्क करी लैता ऐ। रफीक अहमद खान अका रफी रफा बारामुला जिले दे त्रिकन जान बोनियार दा बसनीक ऐ जेहदे चोहादी जम्मू ते बोनियार च दऊं मंजली मकानें, जिंदी कीमत 1 करोड़ 72 लक्ख रुपे दस्सी जा’रदी ऐ, गी कुर्क करी लैता गेआ ऐ। जानकारी मूजब उन्ने नशीले पद्धार्थे दे कारोबार राएं एह संपत्तियां बनाई दियां हियां।

<><><><><><>

JMC QR Code

जम्मू मुनिसिपल कारपोरेशन जेएमसी नै छें थमां कूड़े-कचरे दे प्रबंधन सरबंधी शुल्क गी किट्ठा करने आले कम्में गी सोक्खा बनाने लेई एंड्रायड क्यूआर आधारित प्वाइंट ऑफ सेल

पीओएस पैहलकदमी दी शुरूआत कीती ऐ। एहदे कन्नै बसनीक मोबाइल ऐप, वालेट कन्नै यूपीआई राएं डिजीटल अदायगी करी सकदे न। जेएमसी नै इक सोशल मीडिया पोस्ट च आखेआ जे एह पैहलकदमी कूड़े कचरे सरबंधी प्रबंधन सरिस्ते गी आधुनिक बनाने ते लैनदेन सरबंधी प्रणाली गी पारदर्शी करने लेई इक महत्वै आली गैह ऐ। पीओएस सरिस्ता बक्ख—बक्ख गेड़ें च लागू कीता जाग, एहदी शुरूआत पैहले ताले गेदे वार्डें च कीती जाग ते फही इसी पूरे शैहरा च लागू कीता जाग।

<><><><><><>

SI Posts

जम्मू कश्मीर सेवा चयन बोर्ड जेकेएसएसबी नै जम्मू कश्मीर पुलिस मैहकमे च 669 सब इंस्पैक्टरें दी भर्ती लेई अधिसूचना जारी करी दित्ती ऐ। मेदवार 3 दिसम्बर 2024 थमां ऑनलाइन इरखास्तां जमा कराई सकदे न। दरखास्त जमा कराने दी खीरी तरीक 2 जनवरी 2025 ऐ। लिखित मतेयान दी तरीक दी घोषणा मगरा कीती जाग।

<><><><><><>